

四庫全書

集部

欽定四庫全書

集部
稼軒詞卷二

詳校官中書_臣呂光復

侍讀_臣孫球覆勘

總校官庶吉士_臣何思鈞

校對官檢討_臣孫玉庭

謄錄監生_臣易藻

欽定四庫全書

稼軒詞卷二

宋 辛棄疾 撰

滿江紅

建康史帥致道席上賦

鵬翼垂空笑人世蒼然無物又還去九重深處玉階山
立袖裏珍奇光五色他年要補天西北且歸來談笑護
長江波澄碧佳麗地文章伯金縷唱紅牙拍看樽前
飛下日邊消息料想寶香熏閣夢依然畫舫清溪笛待

如今端的約鍾山長相識

又

中秋
寄遠

快上西樓怕天教浮雲遮月但喚取玉纖橫管一聲吹
裂誰做冰壺涼世界最憐玉斧修時節問嫦娥孤處有
愁無應華髮雲液滿瓊杯滑長袖舞清歌咽歎十常
八九欲磨還缺但願長圓如此夜人情未必看承別把
從前離恨總包藏歸時說

又

中秋

美景良辰算只是可人風月況素節揚輝長是十分清
徹著意登樓瞻玉兔何人張幙遮銀闕倩飛廉持得
吹開憑誰說弦與望從圓缺今與昨何區別羨夜來
把手桂花堪折安得便登天柱上從容陪伴酬佳節更
如今不聽塵談清愁如髮

又暮

春

點火櫻桃照一架荼蘼如雪春正好見龍孫穿破紫苔
蒼壁乳燕引雛飛力弱流鶯喚友嬌聲怯問春歸不肯帶

愁歸腸千結 層樓望春山疊家何在煙波隔把古今
遺恨向他誰說蝴蝶不傳千里夢子規叫斷三更月聽
聲聲枕上勸人歸歸難得

又

家住江南又過了清明寒食花徑裏一番風雨一番狼
藉紅粉暗隨流水去園林漸覺清陰密算年年落盡刺
桐花寒無力 庭院靜空相憶無說處閒愁極怕流鶯
乳燕得知消息尺素如今何處也綠雲依舊無踪跡謾

教人羞去上層樓
平蕪碧

又

贛州席上呈太守陳李陵侍郎

落日蒼茫風纔定
片帆無力還記得
看來眼去水光山
色倦客不知身遠
近佳人已卜歸消
息便歸來只是賦
行雲襄王客
些箇事如何得知
有恨休重憶但楚
天特地暮雲凝碧
過眼不如人意事
十常八九今頭白
笑江州司馬太多
情青衫溼

又

賀王帥宣平湖南寇

笳鼓歸來舉鞭問何如諸葛人道是悠悠五月渡瀘溪
入白羽生風貔虎譟青溪路斷鼃鼃泣早紅塵一騎落
平岡捷書急三萬卷龍頭客渾未得文章力把詩書
馬上笑驅鋒鏑金印明年如斗大貂蟬却自兜鍪出待
刻公勲業到雲霄浯溪石

又

漢水東流都洗盡蠻兒膏血人盡說君家飛將舊時英
烈破敵金城雷過耳談兵玉帳冰生頰想王郎結髮賦

從戎傳遺業 腰間劒聊彈 缺尊中酒堪為別 況故人
新擁漢壇旌節馬革裹屍當自誓 蛾眉伐性休重說 但
從今記取楚臺風庾樓月

又

江行簡楊濟
翁周顯先

過眼溪山怪都是 舊時曾識還記得 夢中行遍江南江
北佳處徑須攜杖去 能消幾兩平生屐 笑塵勞三十九
年非長為客 吳楚地東南坼 英雄事曹劉敵 被西風
吹盡了無塵跡 樓觀甫成人已去 旌旗未卷頭先白 歎

人生哀樂轉相尋今猶昔

又

敲碎離愁紗窗外風搖翠竹人去後吹簫聲斷倚樓人
獨滿眼不堪三月暮舉頭已覺千山綠但試把一紙寄
來書從頭讀相思字空盈幅相思意何時足滴羅襟
點點淚珠盈掬芳草不迷行路客垂楊只碍離人目最
苦是立盡月黃昏欄干曲

又

倦客新豐貂裘敝征塵滿目彈短鋏青蛇三尺浩歌誰
續不念英雄江左老用之可以尊中國歎詩書萬卷致
君人翻沉陸休感慨澆醺醪人易老歡難足有玉人
憐我為簪黃菊且置請纓封萬戶竟須賣劍酌黃犢甚
當年寂寞賈長沙傷時哭

又

風捲庭梧黃葉墜新涼如洗一笑折秋英同賞弄香接
藥天遠難窮休久望樓高欲下還重倚拚一襟寂寞淚

金史卷一百一十五
卷二
彈秋無人會 今古恨沉荒壘悲歡事隨流水想登樓
青鬢未堪憔悴極目煙橫山數點孤舟月淡人千里對
嬋娟從此話離愁金樽裏

又冷泉亭

直節堂堂看夾道冠纓拱立漸翠谷羣仙來下珮環聲
急誰信天鋒飛墮地傍湖千丈開青壁是當年玉斧削
方壺無人識 山水潤琅玕溼秋露下瓊珠滴向危亭
橫跨玉淵澄碧醉舞且搖鸞鳳影浩歌莫遣魚龍泣恨

此中風物本吾家今為客

又
再用前韻

照影溪梅悵絕代佳人獨立便小駐雍容千騎羽觴飛
急琴裏新聲風響珮筆端醉墨雅棲壁是使君文雅舊
知名今方識高欲卧雲還溼清可漱泉長滴快晚風
吹帽滿懷空碧寶馬嘶歸紅旆動龍團試水銅瓶泣怕
他年重到路應迷桃源客

又
席間和洪景廬舍人
兼司馬漢章大監

天與文章看萬斛龍文筆力聞道是一詩曾換千金顏
色欲說又休新意思彊啼偷笑真消息算人人合與共
乘鸞鑒坡客 傾國豔難再得還可恨還堪憶看書尋
舊錦衫裁新碧鶯蝶一春花裏活可堪風雨飄紅白問誰
家却有燕歸梁香泥溼

又 送湯朝美司諫
自汴歸金壇

瘴雨蠻煙十年夢樽前休說春正好故園桃李待君花
發兒女燈前和淚拜雞豚社裏歸時節看依然舌在齒

牙牢心如鐵 活國手封侯骨騰汗漫排闥闔待十分
做了詩書勲業當日念君歸去好而今却恨中年別笑
江頭明月更多情今宵缺

又

送李正之
提刑入蜀

蜀道登天一盃送繡衣行客還自歎中年多病不堪離
別東北看騰諸葛表西南更草相如檄把功名收拾付
君侯如椽筆 兒女淚君休滴荆楚路吾能識要新詩
準備廬山山色赤壁磯頭千古浪銅鞮陌上三更月正

梅花萬里雪深時須相憶

又

送信守鄭
舜舉被召

湖海平生算不負蒼髯如戟聞道是使君著意太平長
策此老自當兵十萬長安正在天西北便鳳凰飛詔下
天來催歸急車馬路兒童泣風雨暗旌旗溼看野梅
官柳東風消息莫向蘼菴追笑語只今松竹無顏色問
人間誰管別離愁杯中物

又

和楊民瞻送佑
之弟還侍浮梁

塵土西風便無限淒涼行色還記取明朝應恨今宵輕
別珠淚爭垂華燭暗雁行欲斷哀箏切看扁舟幸自澀
清溪休催發白石路長亭側千樹柳千絲結怕行人
西去棹歌聲闌黃卷莫教詩酒污玉階不信仙凡隔但
從今伴我又隨君佳哉月

又

遊南巖和
范先之韻

笑拍洪崖問千丈翠巖誰削依舊是西風白鳥北村南
郭似整復斜僧屋亂欲吞還吐林煙薄覺人間萬事到

秋來都搖落 呼斗酒同君酌更小隱尋幽約且丁寧
休負北山猿鶴有鹿從渠求鹿夢非魚定未知魚樂正
仰看飛鳥却應人回頭錯

又

和范先
之咏雪

天上飛瓊畢竟向人間情薄還又跨玉龍歸去萬花搖
落雲破林梢添遠岫月明屋角分層閣記少年駿馬走
韓盧掀東郭 吟凍雁嘲飢鵲人已老歡猶昨對瑤華
滿地與君酬酢最愛霏霏迷遠近都收擾擾還空闊待

羔兒飲罷又烹茶揚州鶴

又 病中俞山甫教授
訪別病起寄之

曲几團蒲記方丈君來問疾更夜雨匆匆別去一杯南
北萬事莫侵閒鬢髮百年正要佳眠食最難忘此語重
殷勤千金值西崦路東巖石攜手處今塵迹望東來
猶有舊盟如日莫信蓬萊風浪隔垂天自有扶搖力對
梅花一夜苦相思無消息

又 錢鄭衡州厚
卿席上再賦

莫折荼蘼且留取一分春色還待得青梅如豆共伊同
摘少日對花渾醉夢而今醒眼看風月恨牡丹笑我倚
東風頭如雪榆莢錢菖蒲葉時節換繁華歎算怎禁
風雨怎禁鷓鴣老冉冉今花共柳是栖栖者蜂和蝶也
不因春去有閒愁因離別

又送徐行
仲撫幹

絕代佳人曾一笑傾城傾國休更歎舊時青鏡而今華
髮明日伏波堂上客老當益壯翁應說恨苦遭鄧禹笑

人來長寂寂 詩酒社江山
筆松菊徑雲煙履怕一觴
一詠風流絃絕我夢橫山
孤鶴去覺來却與君相別
記功名萬里要吾身佳眠食

又

紫陌飛塵望十里雕鞍繡轡春未老已驚臺榭瘦紅肥
綠睡雨海棠猶倚醉舞風楊柳難成曲問流鶯能說故
園無曾相熟 巖泉上飛鳬浴巢林下棲禽宿恨荼蘼
開晚謾翻紅玉蓮社豈堪談昨夢蘭亭何處尋遺墨但

羈懷空自倚鞦韆無心蹴

又

盧國華由閩憲移漕建安陳端仁給事同諸公
餞別余為酒困卧清涂堂上三鼓方醒國華賦

詞留別席
上和韻

宿酒醒時算只有清愁而已人正在清涂堂上月華如
洗紙帳梅花歸夢覺尊羹鱸膾秋風起問人生得意幾
何時吾歸矣君若問相思事料長在歌聲裏這情懷
只是中年如此明月何妨千里隔顧君與我如此耳向
樽前重約幾時來江山美

又和盧國華

漢節東南看駟馬光華周道須信是七閩還有福星來
到庭草自生心意足榕陰不動秋光好問不知何處著
君侯蓬萊島還自笑人今老空有恨縈懷抱記江湖
十載厭持旌纛獲落我材無所用易除殆類無根潦但
欲搜好語謝新詞羞瓊報

又山居
即事

幾箇輕鷗來點破一泓澄綠更何處一雙鷗鵲故來爭

浴細讀離騷還痛飲飽看脩竹何妨肉有飛泉日日供
明珠五千斛 春雨滿秧新穀閒日永眠黃犢看雲連
麥隴雪堆蠶簇若要足時今足矣以為未足何時足被
野老相扶入東園枇杷熟

又

和傅巖叟
香月韻

半山佳句最好是吹香隔屋又還怪冰霜側畔蜂兒成
簇更把香來薰了月却教影去斜侵竹似神清骨冷住
西湖何由俗 根老大穿坤軸枝天嫋蟠龍斛快酒兵

長俊詩壇高築一再人來風味惡兩三杯後花緣熟記
五更聯句失彌明龍銜燭

又

壽趙茂嘉郎中前
章記無濟倉事

我對君侯怪長見兩眉陰德還夢見玉堂金闕姓名仙
籍舊歲炊煙渾欲斷被公扶起千人活算胸中除却五
車書都無物山左右溪南北花遠近雲朝夕看風流
杖屨蒼髯如戟種柳已成陶令宅散花更滿維摩室勸
人間且住五千年如金石

又

呈趙晉
臣數文

老子平生原自有金盤
華屋還又要萬間寒士眼前突
兀一舸歸來輕似葉
兩翁相對清如鵠
到如今吾亦愛
吾廬多松菊
人道是荒年穀還又似豐年玉
甚等閒却為鱸魚歸
速野鶴溪邊留杖屨
行人牆外聽絲竹
問近來風月幾篇詩
三千軸

又

游清風峽和趙
晉臣數文韻

兩峽斬巖問誰占
清風舊築滿眼裏
雲來鳥去澗紅山綠

世上無人供笑傲門前有客休迎肅怕淒涼無物件君
時多栽竹風采妙凝冰玉詩句好餘膏馥嘆只今人
物一變應足人似秋鴻無定住事如飛彈須圓熟笑君
侯陪酒又陪歌陽春曲

木蘭花慢

席上送張仲
固帥興元

漢中開漢業問此地是耶非握劔指三秦君王得意一
戰東歸興亡事今不見但山川滿目淚沾衣落日邊塵
未斷西風塞馬空肥一篇書是帝王師小試去征西

更草草離筵匆匆去路愁滿旌旗君思我回首處正江
涵秋影雁初飛安得車輪四角不堪帶減腰圍

又

滁州送
范倅

老來情味減對別酒怯流年況屈指中秋十分好月不
照人圓無情水都不管共西風只管送歸船秋晚尊鱸
江上夜深兒女燈前征衫便好去朝天玉殿正思賢
想夜半承明留教視草却遣籌邊長安故人問我道愁
腸殢酒只依然目斷秋霄落雁醉來時響空絃

又題上饒州
圖翠微樓

舊時樓上客愛把酒對南山笑白髮如今天教放浪來
往其間登樓更誰念我却回頭西北望層欄雲雨珠簾
畫棟笙歌霧鬢風鬟近來堪入畫圖看父老願公歡
甚拄笏悠然朝來爽氣正爾相關難忘使君後日便一
花一草報平安與客攜壺且醉雁飛秋影江寒

又寄題吳克明
廣文菊隱

路傷人怪問此隱者姓陶不甚黃菊如雲朝吟暮醉喚

不回頭縱無酒成悵望只東籬搔首亦風流與客朝食
一笑落英飽便歸休 古來堯舜有巢由江海去悠悠
待說與佳人種成香草莫怨靈脩我無可無不可意先
生出處有如丘聞道問津人過殺雞為黍相留

水龍吟

旅次登樓作

楚天千里清秋水隨天去秋無際遙岑遠目獻愁供恨
玉簫螺髻落日樓頭斷鴻聲裏江南游子把吳鉤看了
攔干拍遍無人會登臨意 休說鱸魚堪膾儘西風季

鷹歸未求田問舍怕應羞見劉郎才氣可惜流年憂愁
風雨樹猶如此倩何人喚取紅巾翠袖搵英雄淚

又

甲辰歲壽韓
南澗尚書

渡江天馬南來幾人真是經綸手長安父老新亭風景
可憐依舊夷甫諸人神州沈陸幾曾回首算平戎萬里
功名本是真儒事公知否況有文章山斗對桐陰滿
庭清晝當年墮地而今試看風雲奔走綠野風煙平泉
草木東山歌酒待他年整頓乾坤事了為先生壽

又

次年南澗用韻為僕與公生日相去一日再和以壽南澗

玉皇殿閣微涼看公重試薰風手高門畫戟桐陰聞道
青青如舊蘭佩空芳蛾眉誰妒無言搔首甚年年却有
呼韓塞上人爭問公安否金印明年如斗向中州錦
衣行畫依然盛事貂蟬前後鳳麟飛走富貴浮雲我評
軒冕不如杯酒待從公痛飲八千餘歲伴莊椿壽

又

盤園任子嚴安撫挂冠得請客以高風名其堂書來索詞為賦

斷崖千丈孤松挂冠更在松高處平生袖手故應休矣

功名良苦笑指兒曹人間醉夢莫嗔驚汝問黃金餘幾
旁人欲說田園記君推去嘆息鄉舊隱對先生竹窗
松戶一花一草一觴一詠風流杖屨野馬塵埃扶搖下
視蒼然如許恨當年九老圖中忘却花盤園林路

又

寄題京口范南伯知縣家文官花花
白次緋次紫唐會要載學士院有之

倚欄看碧成朱等閒褪了香苞粉上林高選匆匆又換
紫雲衣潤幾許春風朝薰暮染為花忙損笑舊家桃李
東塗西抹有多少淒涼恨擬倩流鶯說與記榮華易

消難整人間得意千紅萬紫轉頭春盡白髮憐君儒冠
曾悞平生官冷算風流未減年年醉裏把花枝問

又題雨巖巖類今所畫觀音普
陀巖中有泉飛出如風雨聲

普陀大士虛空翠巖記取飛來處蜂房萬點似穿如碍
玲瓏窗戶石髓千年已垂未落嶙峋冰柱有怒濤聲遠
落花香在人疑是桃源路又說春雷鼻息是卧龍彎
環如許不然應是洞庭張樂湘靈來去我意長松倒生
陰壑細吟風雨竟茫茫未曉只應白髮是開山祖

又
瓢泉

稼軒何必長貧放泉簷外瓊珠瀉樂天知命古來誰會
行藏用舍人不堪憂一瓢自樂賢哉回也料當年嘗問
飯疏飲水何為是栖栖者且對浮雲山上莫匆匆
去流山下蒼顏照影故應零落輕裘肥馬遶齒冰霜滿
懷芳乳先生飲罷笑挂瓢風樹一鳴渠碎問何如啞

又
用瓢泉韻戲仁和兼
諸葛元亮且督和詞

被公驚倒瓢泉倒流三峽詞源瀉長安紙貴流傳一字

千金爭舍割肉懷歸先生自笑又何廉也但銜杯莫問
人間豈有如孺子長貧者誰識稼軒心事似風乎舞
雩之下回頭落日蒼茫萬里塵埃野馬更想隆中卧龍
千尺高吟纔罷倩何人與間雷鳴瓦釜甚黃鍾啞

又

用些語再韻瓢泉歌以飲
客聲語甚諧客皆為之齟

聽兮清珮瓊瑤些明兮鏡秋毫些君無去此流昏漲膩
生蓬蒿些虎豹甘人渴而汝寧猿猱些大而流江海覆
舟如芥君無助狂濤些路險兮山高些愧余獨處無

聊些冬槽春盎歸來為我製松醪些其外芬芳團龍片
鳳煮雲膏些古人兮既往嗟余之樂樂簞瓢些

又過南閭
雙溪樓

舉頭西北浮雲倚天萬里須長劒人言此地夜深長見
斗牛光焰我覺山高潭空水冷月明星淡待燃犀下看
凭欄却怕風雷怒魚龍慘峽東蒼江對起過危樓欲
飛還飲元龍老矣不妨高卧冰壺涼簟千古興亡百年
悲笑一時登覽問何人又却片帆沙岸繫斜陽纜

又

愛李延年歌淳于髡語今為詞
庶幾高唐神女洛神賦之意云

昔時曾有佳人翩然絕世而獨立未論一顧傾城再顧
又傾人國寧不知傾城傾國佳人難再得看行雲行
雨朝朝暮暮陽臺下襄王側堂上更闌燭滅記主人
留髣送客合樽促坐羅襦襟解微聞薜澤當此之時止
乎禮義不淫其色但啜其泣矣啜其泣矣又何嗟及

又

別傅先之提舉
時先之有召命

只愁風雨重陽思君不見令人老行期定否征車幾輒

去程多少有客書來長安却早傳聞追詔問歸來何日
君家舊事直須待為霖了從此蘭生蕙長吾誰與玩
茲芳草自憐拙者功名相避去如飛鳥只有良朋東阡
西陌安排似巧到如今巧處依然又拙把平生笑

又

老來曾識淵明夢中一見參差是覺來幽恨停觴不御
欲歌還止白髮西風折腰五斗不應堪此問北窗高卧
東籬自醉應別有歸來意須信此翁未死到如今凜

然生氣吾儕心事古今長在高山流水富貴他年直饒
來晚也應無味甚東山何事當時也道為蒼生起

摸魚兒

淳熙己亥自湖北漕移湖南
同官王正之置酒小山亭賦

更能消幾番風雨匆匆春又歸去惜春長怕花開早何
況落紅無數春且住見說道天涯芳草無歸路怨春不
語算只有殷勤畫簷蛛網盡日惹飛絮長門事準擬
佳期又誤蛾眉曾有人妒千金曾買相如賦脈脈此情
誰訴君莫舞君不見玉環飛燕皆塵土閒愁最苦休去

倚危欄斜陽正在煙柳斷腸處

又

觀潮上
葉丞相

望飛來半空鷗鷺須臾動地鼙鼓截江組練驅山去塵
戰未收貔虎朝又暮悄慣得吳兒不怕蛟龍怒風波平
步看紅旆驚飛跳魚直上蹙踏浪花舞憑誰問萬里
長鯨吞吐人間兒戲千弩滔天力倦知何事白馬素車
東去堪恨處人道是屬餽怨憤足千古功名自誤謾教
得陶朱五湖西子一舸弄煙雨

又

雨巖有石狀甚怪取離騷九歌名曰山鬼因賦摸魚兒改名山鬼謠

問何年此山來此西風落日無語看君似是羲皇上直
作太虛名汝溪上佳算只有紅塵不到今猶古一杯誰舉
笑我醉呼君崔嵬未起山鳥覆杯去須記取昨夜龍
湫風雨門前石浪掀舞四更山鬼吹燈嘯驚倒世間兒
女依然處還問我清遊杖屨公良苦神交心許待萬里攜
君鞭笞鸞鳳送我遠遊賦

石浪菴外巨石也長三十餘丈

西河

送錢仲畊自江西漕移守婺州

西江水道是江西人淚無情却解送行人月明千里從
今日日倚高樓傷心煙樹如薺會君難別君易草草不
如人意十年著破繡衣茸種成桃李問君可是厭承明
東方鼓吹千騎對梅花更消一醉看明年調鼎風味
老病自憐憔悴過吾廬定有幽人相問歲晚淵明歸來
未

永遇樂

送陳仁和自汴東歸陳至
上饒之一年得子甚喜

紫陌長安看花年少無限歌舞白髮憐君尋芳較晚捲

地驚風雨問君知否
鴟夷載酒不似并瓶身
誤細思量
悲歡夢裏覺來總無尋處
芒鞋竹杖天教還了千古
玉樓佳句落魄東歸
風流贏得掌上明珠去
起看青鏡
南冠好在拂了舊時塵土
向君道雲霄萬里
這回穩步

又

梅雪

怪底寒梅一枝雪裏
只恁愁絕問訊無言
依稀似妒天上飛英
白江上一夜瓊瑤萬頃
此段如何如得細看來
風流添得自家越樣標格
晚來樓上對花臨鏡學作

半點粧額著意爭妍那知却有人妒花顏色無情休問許多般事且自訪梅踏雪待行過溪橋夜半更邀素月

又

戲賊辛字送茂
嘉十二弟赴調

烈日秋霜忠肝義膽千載家譜得姓何年細參辛字一笑君聽取艱辛做就悲辛滋味總是辛酸辛苦更十分向人辛辣椒桂搗殘堪吐世間應有芳甘濃美不到吾家門戶比著兒曹纍纍却有金印光垂組付君此事從今直上休憶對牀風雨但贏得韡紋縞面記余戲語

又

檢校停雲新種杉松戲作時欲作親舊
報書紙筆偶為大風吹去未章因及之

投老空山萬松手種政爾堪嘆何日成陰吾年有幾似
見兒孫晚古來池館雲煙艸棘長使後人淒斷想當年
良辰已恨夜闌酒空人散停雲高處誰知者予萬事
不關心眼夢覺東窗聊復爾爾起欲題書簡霎時風怒
倒翻筆硯天也只教吾懶又何事催詩雨急片雲斗暗

又

京口北固
亭懷古

千古江山英雄無覓孫仲謀處舞榭歌臺風流總被雨

打風吹去斜陽草樹尋常巷陌人道宋公曾住想當年
金戈鐵馬氣吞萬里如虎元嘉草草封狼居胥贏得
倉皇北顧四十三年望中猶記燈火揚州路可堪回首
佛狸祠下一片神鴉社鼓憑誰問廉頗老矣尚能飯否

歸朝歡

靈山喬菴菖蒲港皆長松茂林獨野櫻花
一株山上盛開照映可愛不數日風雨催

敗殆盡意有感因效介菴體為賦且
以菖蒲綠名之丙辰歲三月三日也

山下千林花太俗山上一枝看不足春風正在此花邊
菖蒲自蘸清溪綠與花同草木問誰風雨飄零速莫悲

歌夜深巖下驚動白雲宿 病怯殘年頻自卜老愛遺
篇難細讀苦無妙手畫於菟人間雕刻真成鵠夢中人
似玉覺來更憶腰如束許多愁問君有酒何不曰絲竹

又

寄題三山鄭元英巢經樓之側有尚
友齋欲借書者就齋中取讀書不借出

萬里康成西走蜀藥市船歸書滿屋有時光彩射星躔
何人汗簡讎天祿好之寧有足請看良賈藏金玉記斯
文千年未喪四壁聞絲竹 試問辛勤攜一束何以牙
籤三萬軸古來不作借人癡有朋只就芸窗讀憶君清

夢熟覺來笑我便腹倚危樓人間誰舞掃地八風曲

又

題趙晉臣敷
文積翠巖

我笑共工緣底怒觸斷我天一柱補天又笑女媧忙
却將此石投閒處野煙荒草路先生拄杖來看汝倚蒼
苔摩挲試問千古幾風雨長被兒童敲火苦時有牛

羊磨角去霍然千丈翠巖屏鏘然一滴甘泉乳結亭三
四五會相暖熱攜歌舞細思量古來寒士不遇有時遇

又

丁卯歲寄題眉
山李參政石林

見說岷峨千古雪都作岷峨山上石君家右史老泉公
千金未盡勤收拾一堂真古石間庭更與天突兀記當
時長編筆硯日日雲煙溼野老時逢山鬼泣誰夜持
山去難覓有人依樣入明光玉堦之下巖巖立琅玕無
數碧風流不數平泉物欲重吟青葱玉樹須倩子雲筆

一枝花

醉中
戲作

千丈擎天手萬卷懸河口黃金腰下印大如斗更千騎
弓刀揮霍遮前後百計千方久似鬪草兒童羸箇他家

偏有 算枉了雙眉長皺白髮空回首那時間說向山中
友看丘隴牛羊更辨賢愚否且自栽花柳怕有人來但
只道今朝中酒

喜遷鶯

謝趙晉臣敦文賦芙蓉詞見壽用韻為謝

暑風涼月愛亭亭無數綠衣持節掩冉如羞參差似妒
擁出芙蓉花發步觀潘娘堪恨貌比六郎誰潔添白鷺
晚晴時公子佳人並列 休說辜未未當日靈均恨與
君王別心阻媒勞交疎怨極恩不甚今輕絕千古離騷

文字至今猶未歇都休問但干杯快飲露荷翻葉

瑞鶴仙

壽上饒倅洪莘之時
攝郡事且將赴漕舉

黃金堆到斗怎得似長年畫堂勸酒蛾眉最明秀向水
沈煙裏兩行紅袖笙歌擁就爭說道明年時候被姮娥
做了慙慙仙桂一枝入手知否風流別駕近日人呼
文章太守天長地久歲上迺翁壽記從來人道相門出
相金印累累儘有但直須周公拜前魯公拜後

又

賦
梅

雁霜寒透幙正護月雲輕嫩冰猶薄溪奩照梳掠想含
香弄粉豔粧難學玉肌瘦弱更重重龍銷襯著倚東風
一笑嫣然轉盼萬花羞落寂寞家山何在雪後園林
水邊樓閣瑤池舊約鄰翁更仗誰托粉蝶兒只是尋挑
覓柳開遍南枝未覺但傷心冷落黃昏數聲畫角

又南澗雙
溪樓

片帆何太急望一點須臾去天咫尺舟人好看客似三
峽風濤嵯峨劒戟溪南溪北正遐想幽人泉石看漁樵

指點危樓却羨舞筵歌席
歎息山林鍾鼎意倦情遷
本無欣戚轉頭陳迹飛鳥外
晚煙碧問誰憐舊日南樓
老子最愛月明吹笛到而今
撲面黃塵欲歸未得

聲聲慢

旅次登樓作

征埃成陣行客相逢都道
幻出層樓指點簷牙高處浪
湧雲浮今年太平萬里罷長淮
千騎臨秋凭欄望有東
南佳氣西北神州
千古懷嵩人去還笑我身在楚尾
吳頭看取弓刀陌上車馬如流
從今賞心樂事剩安排

酒令詩籌華胥夢願年年人似舊游

又

朔紅木犀余兒時嘗入京師
禁中凝碧池因書當時所見

開元盛日天上栽花月殿桂影重重十里芬芳一枝金
粟玲瓏管絃凝碧池上記當時風月愁儂翠華遠但江
南草木煙鎖深宮 只為天姿冷澹被西風醞釀徹骨
香濃枉學丹蕉葉底偷染妖紅道人取次裝束是自家
香底家風又怕是為淒涼長在醉中

又

送上饒黃倅
職滿赴調

東南形勝人物風流白頭見君恨晚便覺君家叔度去
人未遠長憐士元驥足道直須別駕方展問箇裏待怎
生銷殺胸中萬卷 況有星辰劒履是傳家合在玉皇
香案零落新詩我欠可人消遣留君再三不住便直饒
萬家淚眼怎抵得這睂間黃色一點

又 藥拈淵明
停雲詩

停雲靄靄八表同昏盡日時雨濛濛搔首良朋門前平
陸成江春醪湛湛獨撫恨彌襟閒飲東窗空延佇恨舟

車南北欲往何從 嘆息東園佳樹列初榮枝葉再競
春風日月于征安得促席從容翩翩何處飛鳥息庭柯
好語和同當年事問幾人親友似翁

八聲甘州

壽建康帥胡長文給事時方閱
拆紅梅之舞且有錫帶之寵

把江山好處付公來金陵帝王州想今年燕子依然認
得王謝風流只用平時樽俎彈壓萬貌貅依舊鈞天夢
玉殿東頭 看取黃金橫帶是明年準擬丞相封侯有
紅梅新唱香陣卷溫柔且畫堂通宵一醉待從今更數

八千秋公知否邦人香火夜半纔收

又

夜讀李廣傳不能寐因念晁楚老揚民瞻約同居山間戲用李廣事賦以寄之

故將軍飲罷夜歸來長亭解雕鞍恨灞陵醉尉匆匆未
識桃李無言射虎山橫一騎裂石響驚弦落魄封侯事
歲晚田園誰向桑麻杜曲要短衣匹馬移住南山看
風流慷慨談笑過殘年漢開邊功名萬里甚當時健者
也曾間紗窗外斜風細雨一陣輕寒

雨中花慢

登新樓有懷趙昌甫徐斯遠韓仲正吳子似楊民瞻

舊雨常來今雨不來佳人偃蹇誰留幸山中芋栗今歲
全收貧賤交情落落古今吾道悠悠怪新來却見文友
離騷詩發秦州功名只道無之不樂那知有更堪憂
怎奈向兒曹抵死喚不回頭石卧山前認虎蟻喧牀下
聞牛為誰西望憑欄一餉却下層樓

又

吳子似見和
再用韻為別

馬上三年醉帽吟鞍錦囊詩卷長留悵溪山舊管風月
新收明便關河杳杳去應日月悠悠笑千篇索價未抵

蒲桃五斗涼州 停雲老子有酒盈樽琴書端可消憂
渾未解傾身一飽浙米矛頭心似傷弓塞雁身如喘月
吳牛曉天涼夜月明誰伴吹笛南樓

漢宮春

立春

春已歸來看美人頭上裊裊春幡無端風雨未肯收盡
餘寒年時燕子料今宵夢到西園渾未辨黃柑薦酒更
傳青韭堆盤 却笑東風從此便薰梅染楨更沒些閒
閒時又來鏡裏轉變朱顏清愁不斷問何人會解連環

生怕見花開花落朝來塞雁先還

又

即事

行李溪頭有釣車茶具曲几團蒲兒童認得前度過者
籃輿時時照影甚此身徧滿江湖悵野老行歌不住定
堪與語難呼一自東籬搖落問淵明歲晚心賞何如
梅花政自不惡曾有詩無知翁止酒待重教蓮社人沾
空悵望風流已矣江山特地愁余

又

會稽蓬萊閣懷古

秦望山頭看亂雲急雨倒立江湖不知雲者為雨雨者
雲乎長空萬里被西風變滅須臾回首聽月明天籟人
間萬竅號呼誰向若耶溪上倩美人西去麋鹿姑蘇
至今故國人望一舸歸歟歲云暮矣問何不鼓瑟吹竽
君不見王亭謝館冷煙寒樹啼鳥

又會稽秋風
亭觀雨

亭上秋風記去年嫋嫋曾到吾廬山河舉目雖異風景
非殊功成者去覺團扇便與人疎吹不斷斜陽依舊茫

茫禹跡都無 千古茂林猶在甚風流章句解擬相如
只今木落江冷眇眇愁余故人書報莫因循忘却尊鱸
誰念我新涼燈火一編太史公書

又

答李兼善
提舉和章

心似孤僧更茂林脩竹山上精廬維摩定自非病誰遣
文殊白頭自惜歎相逢語密情疎傾蓋處論心一語只
今還有公無 最喜陽春妙句被西風吹墮金玉鏗如
夜來歸夢江上父老歡余荻花深處喚兒童炊火烹鱸

歸去也絕交何必更修山巨源書

又

答吳子似
總幹和章

達則青雲便玉堂金馬窮則茅廬逍遙小大自適鵬鴉
何殊君如星斗燦中天密密疎疎荒艸外自憐螢火清
光暫有還無千古季鷹猶在向松江道我問訊何如白
頭愛山下去翁定嗔余人生謾爾豈食魚必膾之鱸還
自笑君詩頻覺胃中萬卷藏書

滿庭芳

和丞相
景伯韻

傾國無媒入宮見
妬古來顰損蛾眉
看公如月光彩衆
星稀袖手高山流
水聽羣蛙鼓吹荒
池文章手直須補
衮藻火燦宗彛
癡兒公事了吳蠶
纏繞自吐餘絲幸
一枝麤穩三徑新
治且約湖邊風月
功名事欲使誰知
都休問英雄千古
荒草沒殘碑

又

和洪丞相景伯
韻呈景虛內翰

急管哀絃長歌慢舞連娟十樣宮
眉不堪紅紫風雨曉
稀稀惟有楊花飛絮依舊是萍滿
芳池醑醑在青虬快

剪插遍古銅彝 誰將春色去鸞膠
難覓絃斷蛛絲恨 牡丹多病也
費醫治夢裏尋春不見空腸斷
怎得春知 休惆悵一觴一詠須刻右軍碑

又

游豫章東湖再用韻

柳外尋春花邊得句怪公喜氣軒眉陽春白雪清唱古今稀曾是金鑾舊客記鳳凰獨遶天池揮毫罷天顏有喜催賜尚方彝

公在詞掖嘗拜尚方寶彝之賜

只今江山遠釣天夢覺

清淚如絲算除非痛把酒療花治明日五湖佳興扁舟

去一笑誰知溪堂好且拚一醉倚杖讀韓碑

又

和章泉
趙昌父

西崦斜陽東江流水物華不為人流淨然一葉天下已
知秋屈指人間得意問誰是騎鶴揚州君知我從來雅
興未老已滄洲無窮身外事百年能幾一醉都休恨
兒曹抵死謂我心憂況有溪山杖屨阮籍輩須我來游
還堪笑機心早覺海上有驚鷗

六么令

用陸氏事送玉山令陸
德隆侍親東歸吳中

酒羣花隊攀得短轅折誰憐故山歸夢千里尊羹滑便
整松江一棹檢點能言鴨故人欲接醉懷霜橘墮地金
圓醒時覺長喜劉郎馬上肯聽詩書說誰對叔子風
流直把曹劉壓更看君侯事業不負平生學離腸愁怯
送君歸後細寫茶經煮香雪

又
再用
前韻

倒冠一笑華髮玉簪折陽關自來淒斷却怪歌聲滑放
浪兒童歸舍莫惱比鄰鴨水連山接看君歸興如醉中

醒夢中覺 江上吳儂問我一一煩君說恐使樽酒頻
空賸欠珍珠壓手把漁竿未穩長向滄浪學問愁誰怯可
堪楊柳先作東風滿城雪

醉翁操

頃余從范先之求觀家譜見其冠冕蟬聯
世載勲德先之甚文而好修意其昌未艾

也時覃慶勲臣子孫無見仕者命官之先是屢
試甄錄元祐黨籍家合是二者先之應仕矣將
告諸朝行有日請余作詩以贈屬余避諱持此
戒甚力不得如先之之請又念先之與余遊八
年日從事詩酒間意相得歡甚於其別也何獨
能忽然顧先之長於楚詞而妙於琴阮擬醉翁
操為之詞以敘別異時先之綰組東歸僕當為
買羊沽酒先之為鼓一再行以為山中盛事云

長松之風如公肯余從山中心與吾今誰同湛湛千

里之江上有楓噫送子東

按東字上脫于字

望君之門兮九重

女無悅已誰適為容不龜手藥或一朝

按朝字下脫兮字

取

封昔與遊兮皆童我獨窮兮今翁一魚兮一龍勞心兮
忡忡噫命與時逢子之所食兮萬鍾

醜奴兒近

博山道中效李易安體

千峰雲起驟雨一霎兒價更遠樹斜陽風景怎生圖畫
青旗賣酒山那畔別有人家只消山水光中無事過者

一霎 午睡醒時松窗竹戶萬千瀟灑野鳥飛來又是

一闕

洞仙歌

飛流萬壑共千巖爭秀孤負平生弄泉手歎輕衫帽

按帽

字上當
脫一字幾許紅塵還自喜濯髮滄浪依舊 人生行樂

耳身後虛名何似生前一杯酒便此地結吾廬待學淵

明更手種門前五柳且歸去父老約重來問如此青山

定重來否

按又是一以上係不全之醜奴兒近飛流萬
壑以下乃全首洞仙歌毛氏誤合為一今改

正

又

浮石山莊余友月湖道人何同叔之別墅也山類羅浮故以名同叔嘗作遊山次序榜示余且

索詞為賦洞仙歌以遺之同叔頃遊羅浮遇一老人龐眉幅巾語同叔云當有晚年之契蓋仙云

松關桂嶺望菁葱無路費盡銀鈎榜佳處悵空山歲晚
窈窕誰來須著我醉卧石樓風雨 仙人瓊海上握手
當年笑許君攜半山去剗疊嶂卷飛泉洞府淒涼又却
怕先生多取怕夜半羅浮有時還好長把雲煙再三遮住

又

開南樓
初成賦

娑娑欲舞怪青山歡喜分得清溪半篙水記平沙鷗鷺
落日漁樵湘江上風景依然如此東籬多種菊待學
淵明飲酒詩情不相似十里漲春波一棹歸來只做箇五湖
范蠡是則是一般弄扁舟爭知道他家有箇西子

又

趙晉臣和李能伯韻屬余同和趙以兄弟有職
名為寵詞中頗敘其盛故末章有裂土分茅之

句

舊交貧賤大半成新貴冠蓋門前幾行李看匆匆哂笑

爭出山來憑誰問小草何如遠志 悠悠今古事得喪
乘除暮四朝三又何異任掀天事業冠古文章有幾箇
笙歌晚歲沉滿屋貂蟬未為榮記裂土分茅是公家世

又

丁卯八月
病中作

賢愚相去算其間能幾差以毫釐繆千里細思量義利舜
跖之分孳孳者等是鷄鳴而起 味甘終易壞歲晚還
知君子之交淡如水一餉聚飛蚊其響如雷滾自覺昨
非今是羨安樂窩中泰和湯更劇飲無過半醺而已

驀山溪

停雲竹
遇初成

小橋流水欲下前溪去喚起故人來伴先生風煙杖屨
行穿窈窕時歷小崎嶇斜帶水半遮山翠竹栽成路
一尊遐想剩有淵明趣山上有停雲看山下濛濛細雨
野花啼鳥不肯入詩來還一似笑翁詩自沒安排處

又

趙昌父賦一丘一壑
格律高古因效其體

飯疏飲水客莫嘲吾拙高處看浮雲一丘壑中間甚樂
功名妙手壯也不如人今老矣尚何堪堪釣前溪月

病來止酒辜負鷓鴣杓歲晚念平生待都與鄰翁細說
人間萬事先覺者賢乎淡雪裏一枝開春事梅先覺

最高樓

醉中有索四
時歌為賦

長安道投老倦遊歸七十古來稀藕花雨溼前湖夜桂
枝風澹小山時怎消除須殢酒更吟詩也莫向竹邊
辜負雪也莫向柳邊辜負月閒過了總成癡種花事業
無人問惜花情緒只天知笑山中雲出早鳥歸遲

又

和楊民瞻席上
用韻賦牡丹

西園買誰載萬金歸多病勝遊稀風斜畫燭天香夜涼
生翠葢酒酣時待重尋居士譜謫仙詩看黃底御袍
元自貴看紅底狀元新得意如斗大笑花癡漢妃翠被
嬌無奈吳姬粉陣恨誰知但紛紛蜂蝶亂笑春遲

又

送丁懷忠教授入廣渠赴調都下久不得書或謂從人辟置或謂復歸閩中矣

相思苦君與我同心魚沒雁沈沈是夢松後追軒冕是
化鶴後去山林對西風且悵望到如今待不飲奈何
君有恨待痛飲奈何吾又病君起舞試重斟蒼梧雲外

湘妃淚鼻亭山下鷓鴣吟早歸來流水外有知音

又

慶洪景虛
內翰七十

金閨彥看壽正如川七十具華筵樂天詩句香山裏杜
陵酒債曲江邊問何如歌窈窕舞嬋娟更十歲太公
方出將又十歲武公方入相留盛事看明年直須腰下
添金印莫教頭上欠貂蟬向人間長富貴地行仙

又

聞前岡周氏
旌表有期

君聽取尺布尚堪縫斗粟也堪春人間朋友猶能合古

來兄弟不相容
棣華詩悲二叔
吊周公長歎息
眷令原上急重
歎息豆萁煎正
泣形則異氣應
同周家五世將
軍後前岡千載
義居風看明朝
丹鳳詔紫泥封

又

客有敗碁者代賦梅

花知否花一似何郎
又似沈東陽瘦稜稜地
天然白冷清清地
許多香笑東君還又
向北枝忙著一陣霎
時間底雪更一箇缺
些兒底月山下路水
邊牆風流怕有人知
處影兒守定竹旁廂
且饒他桃李趁少年
場

又

用韻會趙
晉臣數文

花好處不趁綠衣郎
縞袂立斜陽
面皮兒上因誰白骨
頭兒裏幾多香
儘饒他心似鐵也須忙
甚喚得雪來
白倒雪便喚得月來香
殺月誰立馬更窺牆
將軍止渴
山南畔相公調鼎
殿東廂忒高才
經濟地戰爭場

又

吾擬乞歸夫子以田產
未置止我賦此罵之

吾衰矣須富貴何時富貴是危機
暫忘設醴抽身去
未曾得米棄官歸
穆先生陶縣令是吾師
待葺箇園兒

名佚老更作箇亭兒名亦好閒飲酒醉吟詩千年田換
八百主一人人口插幾張匙咄豚奴愁產業豈佳兒

上西平


會稽秋風
亭觀雪

九衢中杯逐馬帶隨車問誰解愛惜瓊華何如竹外靜
聽窸窣行沙自憐是海上山頭種玉人家紛如鬪嬌
如舞纔整整又斜斜要圖畫還我漁蓑凍吟應笑羔兒
無分謾煎茶起來極日向彌茫數盡歸鴉

又

送杜
叔高

恨如新新恨了又重新看天上多少浮雲江南好景落
花時節又逢君夜來風雨春未歸似欲留人樽如海人
如玉詩如錦筆如神更能幾字盡殷勤江天日暮何時
重與細論文綠陰裏聽陽關門掩黃昏



稼軒詞卷二